



საქართველოს რეპროდუქციული ჯანდაცვის სამინისტროს
საქართველოს რეპროდუქციული ჯანდაცვის სამინისტროს
სოციალური დაცვის სამსახური



საქართველოში დაბრუნებულ მიგრანტთა
სარეინტეგრაციო დახმარების სახელმწიფო პროგრამა

პროგრამის კოდი: 270601

განმახორციელებელი უწყება: სსიპ - დევნილთა, ეკომიგრანტთა და
საარსებო წყაროებით უზრუნველყოფის სააგენტო

2020 წელი

სარჩევი

| | |
|--|----|
| შესავალი | 3 |
| 1. პროგრამის დასაბუთება..... | 4 |
| 2. პროგრამის სამიზნე ჯგუფი | 5 |
| 3. პროგრამის მიზანი | 5 |
| 4. პროგრამის შედეგი..... | 6 |
| 5. პროგრამის აღწერა | 6 |
| 6. პროგრამაში მონაწილეობა..... | 8 |
| 7. პროგრამის გავრცელების არეალი | 10 |
| 8. პროგრამის ხანგრძლივობა..... | 10 |
| 9. პროგრამის ბიუჯეტი..... | 10 |
| 10. პროგრამის მონიტორინგი და შეფასება..... | 10 |

შესავალი

საქართველოში დაბრუნებულ მიგრანტთა (შემდგომში - მიგრანტთა) სოციალურ-ეკონომიკური რეინტეგრაციის ხელშეწყობა საქართველოს მთავრობის და სსიპ - დევნილთა, ეკომიგრანტთა და საარსებო წყაროებით უზრუნველყოფის სააგენტოს ერთ-ერთ პრიორიტეტულ მიმართულებას წარმოადგენს.

დაბრუნებულ მიგრანტთა რეინტეგრაციის მხარდაჭერის საკითხი აქტუალური გახდა 2011 წელს საქართველოსა და ევროკავშირს შორის „უნებართვოდ მცხოვრებ პირთა რეადმისიის შესახებ“¹ შეთანხმების ძალაში შესვლის შემდეგ.

საქართველოს, ევროკავშირთან დაახლოების გზაზე, დაბრუნებულ მიგრანტებზე ზრუნვა განესაზღვრა ვალდებულებად ისეთი ინსტრუმენტებით, როგორც იყო სავიზო რეჟიმის ლიბერალიზაციის სამოქმედო გეგმა და საქართველოსა და ევროკავშირს შორის ასოცირების შესახებ შეთანხმება.

საქართველოში დაბრუნებული მიგრანტების სარეინტეგრაციო დახმარების პროგრამის განხორციელება მნიშვნელოვანია ქვეყანაში მიმდინარე მიგრაციული პროცესების მართვის კუთხით. მიგრანტთა რეინტეგრაციის ხელშეწყობა წარმოადგენს საქართველოს მთავრობის N622 დადგენილებით დამტკიცებულ „საქართველოს 2016-2020 წლების მიგრაციის სტრატეგიის“ (შემდგომში „მიგრაციის სტრატეგია“) ერთ-ერთ უმთავრეს მიზანს. დაბრუნებულ მიგრანტთა რეინტეგრაციის სახელმწიფო პროგრამის განხორციელება ასევე გათვალისწინებულია მიგრაციის სტრატეგიის 2019 წლის 29 ნოემბრის მიგრაციის საკითხთა სამთავრობო კომისიის მიერ დამტკიცებული „საქართველოს 2016-2020 წლების მიგრაციის სტრატეგიის 2020 წლის სამოქმედო გეგმით“ (შემდგომში „სამოქმედო გეგმა“). 2015 წლიდან სახელმწიფო ბიუჯეტის დაფინანსებით დაიწყო სამშობლოში ემიგრაციიდან დაბრუნებული საქართველოს მოქალაქეების რეინტეგრაციის ხელშეწყობის პროგრამის განხორციელება. მიგრანტთა სარეინტეგრაციო დახმარების სახელმწიფო პროგრამის მიზანია ემიგრაციიდან დაბრუნებული საქართველოს მოქალაქეებისთვის ისეთი სერვისების შექმნა, რაც უზრუნველყოფს მათი წარმატებული სოციალურ-ეკონომიკური რეინტეგრაციის პროცესს თვითდასაქმების პერსპექტივის შექმნით და საარსებო მდგომარეობის გაუმჯობესების გზით.

სამშობლოში დაბრუნებულ მიგრანტთა წარმატებული, მდგრადი და გრძელვადიანი რეინტეგრაციის მიზნით, სსიპ - დევნილთა, ეკომიგრანტთა და საარსებო წყაროებით უზრუნველყოფის სააგენტო (შემდგომში - სააგენტო) მიგრაციის სტრატეგიის სამოქმედო

¹ 2010 წლის 22 ნოემბრის „შეთანხმება საქართველოსა და ევროკავშირს შორის უნებართვოდ მცხოვრებ პირთა რეადმისიის შესახებ“, რომელიც ძალაში შევიდა 2011 წლის 1 მარტს (ცებგვერდი, 110325003, 15/04/2011)

გეგმის საფუძველზე, ახორციელებს „დაბრუნებულ მიგრანტთა სარეინტეგრაციო დახმარების სახელმწიფო პროგრამას“ (შემდგომში - პროგრამა).

1. პროგრამის დასაბუთება

ევროკავშირის/შენგენის ქვეყნებში უვიზო მიმოსვლის ამოქმედების შემდეგ გაიზარდა საქართველოს მოქალაქეთა მიერ ამ მიმართულებით განხორციელებული შრომითი მიგრაცია და თავშესაფრის მოთხოვნის მაჩვენებელი. საქართველოს მოქალაქეების ნაწილი ხშირად უკანონო მიგრანტი ხდება და სამშობლოში დაბრუნების შემდეგ გარკვეული გამოწვევების წინაშე დგება. ადაპტაციის სირთულე და რეინტეგრაციის პრობლემა, უბიძგებთ ხელახალი ემიგრაციისკენ.

ბოლო წლებში ინტენსიური ხასიათი მიიღო ქართველი შრომითი მიგრანტების სამშობლოში დაბრუნების და საქართველოს ეკონომიკურ ცხოვრებაში მათი რეინტეგრაციის ხელშეწყობის ღონისძიებებმა. გაიზარდა როგორც საქართველოს მოქალაქეების დეპორტაციის, ასევე მათი ნებაყოფილობით დაბრუნების მაჩვენებელიც. საქართველოსა და ევროკავშირს შორის „უნებართვოდ მცხოვრებ პირთა რეადმისიის შესახებ“ შეთანხმების ფარგლებში სამშობლოში დაბრუნებულ მიგრანტთა რიცხვი წლიდან წლამდე იზრდება.

დაბრუნებული მიგრანტები წარმოადგენენ მოსახლეობის ერთ-ერთ ყველაზე მოწყვლად ჯგუფს, რომლებიც სახელმწიფოსგან განსაკუთრებულ მიდგომასა და მხარდაჭერას საჭიროებენ.² სწორედ დაბრუნების ხელშეწყობისა და დაბრუნებულ მიგრანტთა რეინტეგრაციის პროცესის მხარდაჭერას ემსახურება ეს პროგრამა, რაც გულისხმობს დაბრუნებულ მიგრანტთა ხელმისაწვდომობას სხვადასხვა სერვისებზე, მათ შორის სოციალური პროექტების დაფინანსებას საარსებო წყაროების გაჩენის მიზნით, თვითდასაქმების ხელშეწყობას სახელობო იარაღების შესყიდვის გზით და პროფესიული გადამზადებით, სამედიცინო დახმარებას და დროებითი საცხოვრებლით უზრუნველყოფას.

მიგრანტებს სამშობლოში დაბრუნებიდან 1 წლის განმავლობაში, შესაძლებლობა აქვთ ჩაერთონ „საქართველოში დაბრუნებულ მიგრანტთა სარეინტეგრაციო დახმარების პროგრამაში“. პროგრამის ფარგლებში მოხდება ინდივიდუალური მიდგომით მათი თვითდასაქმების ხელშეწყობა, კონკურენტუნარიანობის გაზრდა, საარსებო წყაროს გაჩენის პერსპექტივა და სოციალურ-ეკონომიკური მდგომარეობის გაუმჯობესება. ყოველივე ზემოთ აღნიშნული ხელს შეუწყობს მიგრანტთა მდგრად და გრძელვადიან რეინტეგრაციას და შეამცირებს არალეგალურ ემიგრაციაში განმეორებით გამგზავრების რისკს.

² „საქართველოში დაბრუნებული მიგრანტების საჭიროებების და გამოცდილების კვლევა“, სოციალური კვლევისა და ანალიზის ინსტიტუტი, 2020 წელი.

პროექტში ჩართულ ბენეფიციართა მოსალოდნელი რაოდენობაა წელიწადში 200 ბენეფიციარი.

2. პროგრამის სამიზნე ჯგუფი

პროგრამის სამიზნე ჯგუფს წარმოადგენენ საქართველოს მოქალაქეები ან მოქალაქეობის არმქონე პირები (საქართველოში მუდმივი ცხოვრების უფლებით), რომლებიც:

- საზღვარგარეთ იმყოფებოდნენ ერთ წელზე მეტი ვადით არალეგალურად, ან საზღვარგარეთ ჰქონდათ განაცხადი თავშესაფრის მიღებაზე, ან სარგებლობდნენ თავშესაფრით;
- სამშობლოში დაბრუნებიდან 1 წლის განმავლობაში დარეგისტრირდებიან „საქართველოში დაბრუნებულ მიგრანტთა სარეინტეგრაციო დახმარების“ სახელმწიფო პროგრამაში ჩართვის მიზნით.

დამატებითი პირობები:

- დაბრუნებულ მიგრანტს პროგრამაში რეგისტრაციის შემდეგ, პროგრამის ფარგლებში სარეინტეგრაციო სერვის(ებ)ით სარგებლობის საჭიროების დაფიქსირების შესაძლებლობა აქვს პროგრამაში რეგისტრაციიდან 1 წლის ვადაში. სოციალური ინიციატივების დაფინანსების ან ეკონომიკური აგენტის სუბსიდირების მისაღებად რეგისტრაცია გავლილმა დაბრუნებულმა მიგრანტმა უნდა წარმოადგინოს შევსებული განაცხადი სააგენტოს მიერ გამოცხადებულ პერიოდში, რომელიც გამოქვეყნდება სააგენტოს ვებგვერდზე (www.idp.gov.ge).
- გამონაკლის შემთხვევებში, განსაკუთრებით კორონავირუსით გამოწვეული ვითარების გამო, სააგენტოს დირექტორის ბრძანების საფუძველზე შექმნილ რეინტეგრაციის პროგრამის ადმინისტრირების კომისიას (შემდგომში - კომისია) უფლება აქვს შეცვალოს პროგრამაში მონაწილეობის ვადები.

3. პროგრამის მიზანი

პროგრამის მიზანია, არალეგალურად მყოფი სამშობლოში დაბრუნებული საქართველოს მოქალაქეების რეინტეგრაციის მხარდასაჭერად ისეთი სერვისების შეთავაზება, რომლებიც დაეხმარება მათ ფსიქოლოგიური, დასაქმებისა და თვითდასაქმების პრობლემების დაძლევაში. აღნიშნული სირთულეების გადალახვისა და საზოგადოებაში ღირსეული რეინტეგრაციისათვის რელევანტური სერვისების შეთავაზება უზრუნველყოფს

პროგრამის ბენეფიციარების მხრიდან საზღვარგარეთ არალეგალურად განმეორებით წასვლის ალბათობის შემცირებას და ხელს შეუწყობს მათ რეინტეგრაციას.

4. პროგრამის შედეგი

პროგრამის განხორციელების შედეგად, სსიპ - დევნილთა, ეკომიგრანტთა და საარსებო წყაროებით უზრუნველყოფის სააგენტოს რეინტეგრაციის პროგრამის შესაბამისად, მოხდება წლიურად დაახლოებით 200 მიგრანტის მხარდაჭერა სოციალურ-ეკონომიკური რეინტეგრაციის პროცესში მათთვის სარეინტეგრაციო სერვისების შეთავაზების გზით.

5. პროგრამის აღწერა

პროგრამის ბიუჯეტის გათვალისწინებით, დაბრუნებული მიგრანტები, რომლებიც დარეგისტრირდებიან სსიპ დევნილთა, ეკომიგრანტთა და საარსებო წყაროებით უზრუნველყოფის სააგენტოში, მიიღებენ სარეინტეგრაციო დახმარების სერვისებს შემდეგი ოთხი მიმართულებით:

1. სამედიცინო დახმარება და/ან მედიკამენტების დაფინანსება

გამოკვეთილი სამედიცინო საჭიროების მქონე ბენეფიციარებისათვის:

- ინფორმაციის მიწოდება მოქმედი სახელმწიფო ჯანდაცვის პროგრამების შესახებ და აღნიშნულ პროგრამებში ჩართვაში დახმარების გაწევა;
- მწვავე, ქრონიკული ან/და სიცოცხლისთვის საშიში დაავადებების მქონე პირებისათვის საჭირო სამედიცინო სერვისით უზრუნველყოფა, მათ შორის მედიკამენტოზური მკურნალობის დაფინანსება;
- ფსიქო-სოციალური რეაბილიტაცია.

ერთი ბენეფიციარის სამედიცინო მომსახურებისთვის განკუთვნილი თანხა უნდა იყოს არანაკლებ 50 ლარისა და ჯამში არაუმეტეს 1 000 (ერთი ათას) ლარისა. ასევე, მედიკამენტების რაოდენობა არ უნდა აღემატებოდეს 5 ერთეულს. სამედიცინო მომსახურების დაფინანსება შეიძლება მოხდეს წელიწადში არაუმეტეს 3 ჯერ. იმ მედიკამენტების დაფინანსება, რომლებიც ბენეფიციარს ესაჭიროება ხანგრძლივი პერიოდის განმავლობაში, მოხდება ყოველთვიურად დაბრუნებული მიგრანტის რეგისტრაციიდან ერთი წლის განმავლობაში.

სამედიცინო დაფინანსების მისაღებად საჭიროა სამედიცინო დოკუმენტაციის (ფორმა №IV-100/ა, ინვოისი და სხვა) წარმოდგენა.

2. დროებითი საცხოვრებლით უზრუნველყოფა

საზღვარგარეთ არალეგალურად მყოფი ემიგრანტების დაბრუნებისთანავე, გამოკვეთილი საჭიროებების შემთხვევაში, ბენეფიციარის არაუმეტეს 6 ღამით დროებითი განთავსების უზრუნველყოფა.

ერთი ბენეფიციარისთვის აღნიშნული მომსახურების ჯამური თანხა არ უნდა აღემატებოდეს 240 (ორას ორმოც) ლარს.

გამონაკლის შემთხვევებში, დამატებითი დახმარება შეიძლება გაეწიოს განსაკუთრებული საჭიროებების მქონე ბენეფიციარებს. ასეთ შემთხვევებს განიხილავს კომისია.

3. პროფესიული მომზადება-გადამზადება და კვალიფიკაციის ამაღლების ხელშეწყობა

- საქართველოს ოკუპირებული ტერიტორიებიდან დევნილთა, შრომის, ჯანმრთელობისა და სოციალური დაცვის სამინისტროს სახელმწიფო კონტროლს დაქვემდებარებული სსიპ - სოციალური მომსახურების სააგენტოს სამუშაოს მაძიებელთა პროფესიული მომზადება-გადამზადების და კვალიფიკაციის ამაღლების სახელმწიფო პროგრამაში ჩართვის ხელშეწყობა;
- პროფესიული სწავლების დაფინანსება.

პროფესიული სწავლების დაფინანსება მოხდება მხოლოდ იმ პირობების არსებობის შემთხვევებში, რომელიც არ აძლევს საშუალებას ბენეფიციარს ისარგებლოს „სამუშაოს მაძიებელთა პროფესიული მომზადება-გადამზადების და კვალიფიკაციის ამაღლების სახელმწიფო პროგრამით“, ან/და იმ გარემოების გამო, რომ ბენეფიციარის საჭიროებიდან გამომდინარე, უმჯობესია ისარგებლოს პროფესიული სწავლების შესაძლებლობით ამ პროგრამის მიღმა.

ერთი ბენეფიციარის პროფესიული სწავლების სრული კურსისთვის განკუთვნილი თანხა არ უნდა აღემატებოდეს 1 000 (ერთი ათას) ლარს.

4. სოციალური ინიციატივების დაფინანსება ან ეკონომიკური აგენტის სუბსიდირება

ბენეფიციარის პროფესიიდან, ცოდნიდან და კვალიფიკაციიდან გამომდინარე, შემოსავლის წყაროს გაჩენის, თვითდასაქმებისა და დასაქმების ხელშეწყობის მიზნით მოხდება პროექტების დაფინანსება.

პროექტები დაფინანსდება, როგორც ინდივიდუალური სახით ერთი ბენეფიციარის მიერ წარმოდგენილი პროექტის შესაბამისად, ისე რამდენიმე ბენეფიციარის გაერთიანებით, ასევე არსებულ ეკონომიკურ საქმიანობაში ბენეფიციარის ჩართვის/დასაქმების ფორმით. ბენეფიციართა გაერთიანების შემთხვევაში, პროექტის დაფინანსებისათვის თანხა განისაზღვრება ჯგუფში შემავალი ბენეფიციართა რაოდენობის გათვალისწინებით.

ერთ ბენეფიციარს პროექტი დაუფინანსდება 4000 ლარის ფარგლებში და მხარდაჭერა შესაძლებელია, როგორც დამწყების, ასევე მიმდინარე საქმიანობის გაძლიერების მიზნით.

პროგრამის ფარგლებში განხორციელდება არანაკლებ 500 ლარისა და არაუმეტეს 4000 ლარის ღირებულების ძირითადი საშუალებების შეძენა. ასევე შეძენილი ნივთების რაოდენობა არ უნდა აღემატებოდეს 3 ერთეულს. წარმოდგენილი ინიციატივის გათვალისწინებით, შესაძლებელია ძირითადი საშუალების შეძენა შესაბამისი მომსახურების გაწევით.

პროგრამის ფარგლებში, შესაძენად მოთხოვნილი ნივთი ხელმისაწვდომი უნდა იყოს საქართველოს მასშტაბით. მეორადი ნივთების შეძენა დაშვებულია მხოლოდ საქართველოს კანონმდებლობით რეგისტრირებული მეწარმე სუბიექტისგან, შესაბამისი გარანტიის გაცემით.

პროგრამის ფარგლებში ბენეფიციარები მიიღებენ მხარდაჭერას შემდეგი მიმართულებით:

ა. სასოფლო-სამეურნეო ინიციატივები

ბ. თვითდასაქმებაზე ორიენტირებული არასასოფლო-სამეურნეო ინიციატივები

6. პროგრამაში მონაწილეობა

პროგრამაში მონაწილეობისათვის, დაინტერესებულმა მიგრანტმა უნდა შეავსოს პროგრამის ფარგლებში შემუშავებული რეგისტრაციის ფორმა (**დანართი N1**) და თანდართულ დოკუმენტაციასთან ერთად წარმოადგინოს სააგენტოში შემდეგ მისამართზე: ქ. თბილისი, თამარაშვილის ქ. N15ა ან შევსებული და დასკანერებული სახით გამოგზავნოს სააგენტოს ოფიციალურ ელექტრონულ ფოსტაზე: info@idp.gov.ge.

სრულყოფილად შევსებული რეგისტრაციის ფორმის და თანმდევი დოკუმენტაციის ჩაბარება შესაძლებელია სააგენტოს ტერიტორიულ სამმართველოებშიც, შემდეგ მისამართებზე:

1. ქ. გორი, სამების ქუჩა N1;
2. ქ. რუსთავი, ცურტაველის ქ. N5ა
3. ქ. ქუთაისი, ირ. აბაშიძის გამზ. N27
4. ქ. ზუგდიდი, დ. აღმაშენებლის ქ. N106

განაცხადს თან უნდა ერთოდეს განმცხადებლის პასპორტის ან პირადობის მოწმობის ასლი;

სოციალური ინიციატივის პროექტის დაფინანსების მისაღებად დაინტერესებულმა პირმა უნდა შეავსოს დამატებით „განაცხადის ფორმა“ **დანართი N2** ხოლო ეკონომიკური აგენტის სუბსიდირების პროგრამაში ჩასართავად - **დანართი N3**

განაცხადების წარმოდგენის, შემოწმების, განხილვის, შეფასების კრიტერიუმებისა და გამარჯვებულების გამოვლენის შესახებ ინფორმაცია წარმოდგენილია **დანართი N4-ში**.

პროგრამაში მონაწილე ბენეფიციარს შეუძლია პროგრამის ოთხივე მიმართულებით ისარგებლოს. ასეთ შემთხვევაში ჯამური დაფინანსება არ უნდა აღემატებოდეს 4000 ლარს თითოეულ ბენეფიციარზე.

პროგრამის ფარგლებში არსებული სერვისებით სარგებლობის შესახებ მიგრანტების განაცხადები განიხილება კომისიის მიერ. კომისიის მიერ გადაწყვეტილების მიღების შემდეგ, არაუმეტეს 1 კვირის ვადაში, სააგენტოს დირექტორი გამოსცემს შესაბამის ინდივიდუალურ ადმინისტრაციულ-სამართლებრივ აქტს. გადაწყვეტილება განმცხადებელს ეცნობება სააგენტოს დირექტორის წერილით. სოციალური ინიციატივების დაფინანსების ან ეკონომიკური აგენტის სუბსიდირების კონკურსში გამარჯვებულად გამოვლენილთა სია ქვეყნდება³ ვებგვერდზე (www.idp.gov.ge), რომელიც ავტომატურად მიიჩნევა გამარჯვებულთათვის გამარჯვების შესახებ შეტყობინებად.

საჭიროების შემთხვევაში, მიგრანტს შეიძლება განესაზღვროს ვადა არაუმეტეს 10 კალენდარული დღის ოდენობით და მოეთხოვოს მას განაცხადში/რეგისტრაციის ფორმაში დაშვებული ტექნიკური ხარვეზის გამოსწორება, სავალდებულოდ წარმოსადგენი ან დამატებითი დოკუმენტაციის წარდგენა ან/და ინფორმაციის დაზუსტება. ამავდროულად, მოთხოვნილი დოკუმენტაცია პირდაპირ უნდა იყოს დაკავშირებული პროგრამის მიზნების განხორციელებასთან. განმცხადებელს უფლება აქვს მიიღოს ინფორმაცია, რა მიზნით ხდება დოკუმენტაციის წარდგენა. აღნიშნულის თაობაზე, სააგენტოსა და განმცხადებელს შორის კომუნიკაცია შესაძლებელია როგორც წერილობითი, ისე სატელეფონო და ელექტრონული შეტყობინებით.

³ფიზიკური პირების შემთხვევაში გამოქვეყნდება ბენეფიციარის სახელი, გვარი და განაცხადის ნომერი; ეკონომიკური აგენტების შემთხვევაში - იურიდიული სახელწოდება

სააგენტოს ინტეგრაცია-რეინტეგრაციის სამსახური იღებს გადაწყვეტილებას განაცხადის / რეგისტრაციის ფორმის განუხილველად დატოვების შესახებ, თუ მიგრანტი არ აკმაყოფილებს საკვალიფიკაციო მოთხოვნებს ან განსაზღვრულ ვადაში არ აღმოფხვრა ტექნიკური ხარვეზი ან/და არ დააზუსტა ან/და არ წარმოადგინა მოთხოვნილი დოკუმენტაცია/ინფორმაცია.

7. პროგრამის გავრცელების არეალი

პროგრამა ვრცელდება საქართველოს მთელ ტერიტორიაზე.

8. პროგრამის ხანგრძლივობა

სამოქმედო გეგმის თანახმად, პროგრამა ხორციელდება 2020 წელს.

9. პროგრამის ბიუჯეტი

2020 წელს პროგრამის ფარგლებში უშუალოდ ბენეფიციარების დასახმარებლად გათვალისწინებულია 508,000 ლარი. აქედან სამედიცინო დახმარება და/ან მედიკამენტების დაფინანსებას მოხმარდება 17,000 ლარი, დროებითი საცხოვრებლით უზრუნველყოფას - 2000 ლარი, პროფესიული მომზადება-გადამზადებასა და კვალიფიკაციის ამაღლების ხელშეწყობას - 7000 ლარი და სოციალური ინიციატივების დაფინანსებას ან ეკონომიკური აგენტის სუბსიდირებას - 482,000 ლარი.

დაფინანსება ხორციელდება სახელმწიფო ბიუჯეტიდან გამოყოფილი ასიგნებებიდან. კომისია უფლებამოსილია განიხილოს სერვისებისთვის განკუთვნილი თანხის გადანაწილებაში ცვლილების შეტანის საკითხი. პროგრამაში ცვლილებები შეიძლება ასევე განხორციელდეს კორონავირუსთან დაკავშირებით დაწესებული შეზღუდვების გამო ან სხვა ფორს მაჟორული მდგომარეობიდან გამომდინარე.

10. პროგრამის მონიტორინგი და შეფასება

პროგრამის ფარგლებში, საჭიროებისამებრ განხორციელდება როგორც პირველადი, ისე შემდგომი მონიტორინგი 2 წლის განმავლობაში. პირველადი მონიტორინგის მიზანია, დადგინდეს მოთხოვნილი საჭიროებების რელევანტურობა. დაფინანსების შემდგომი მონიტორინგის მიზანია, შემოწმდეს პროგრამის ფარგლებში განხორციელებული დახმარების

მიზნობრივად გამოყენების ფაქტი და შეფასდეს გაუმჯობესებული საარსებო მდგომარეობა. პირველადი მონიტორინგის ფორმა მოცემულია **დანართი N5** სახით.

პროგრამის შეფასება განხორციელდება 2021-2022 წლებში. პროგრამის შეფასების მიზნით შემუშავდება სპეციალური კითხვარები, რომელთა მიხედვითაც, მოხდება პროგრამის ბენეფიციართა გამოკითხვა. აღნიშნული კვლევის შედეგების ანალიზის შედეგად, გამოვლინდება პროგრამის სუსტი და ძლიერი მხარეები და საჭიროების შემთხვევაში, შემუშავდება რეკომენდაციები პროგრამის უფრო ეფექტურად მუშაობისთვის.